

Boletin informativo

Terser kuartal 2018

Bonbiní! Esaki ta e promé di e tantísimo boletin informativo ku PCN lo bai publiká pa nos partisipantenan aktivo òf èks partisipantenan, dunadónan di trabou i penshonadonan. Ku e boletin informativo akí nos kier tene bo na altura di loke ta pasa enkuanto bo fondo di penshun i nos ta duna bo tepnan útil enkuanto bo penshun.

Palabra di presidente

Despues di amargura...

Un Promé Minister hulandes a yega di bisa den Tweede Kamer despues di un seri di medidanan di ousteridat doloroso: “Despues di amargura ta sigui dulsura”. Mi mester a pensa riba esei na momentu ku luna pasá mi a firma e kombenio ku ministerio di Asuntunan Interno i Relashon di Reino pa fortifikashon di e kapital di penshun di PCN.

Sigur un año pasá kosnan tabata pinta muchu mas skur pa PCN: a kaba kòrta e penshunnan ku 3,5% i pa 2018 tabata vislumbrá un otro bahada di kisas te asta 10%. Pero nèt na momentu ku ningun hende tabata spera esei, e interes merikano a subi i PCN a konosé un año sumamente bon pa loke ta trata e rendimentu riba invershonnan. Huntu ku e medidanan ku a introdusí anteriormente kaba, entre otro e kòrtamentu i e oumentu di e prima te na e máximo pa partisipantenan aktivo, PCN a bolbe logra fin di 2017 un grado di kobertura di alrededor di 100%. Ku esei e menasa di kòrtamentu pa 2018 no for di mesa! Pa un parti, debí na e finansiamentu adishonal dor di gobièrnu, por yama e rekuperashon di e grado di kobertura di PCN ku mas di 20% trankil espektakular. E ta indiká na mes momentu tambe kon instabil asuntunan por ta. Un subida - òf nèt kontrali: un bahada – di e interes tin un impakto enorme riba salú finansiero di PCN. Meskos ku nos ta probechá na e momentunan akí di e interes ku a subi, den futuro nos lo por bai sinti atrobe efektonan negativo ora e interes kuminsá baha.

E grado di kobertura di PCN ta na final di yùli 2018 112,8%. Ku esaki PCN, tres kuartal konsekutibo, tin un grado di kobertura di mas di 100% i PCN a sali for di e término di rekuperashon. Esei ta nifiká ku, te asta si den e añanan benidero tin kontratempu atrobe, no tin direktamente kuestion di kòrtamentu di nobo riba término korto. Si akaso e fondo bolbe hañ’é konfrontá ku un kobertura di ménos, PCN e ora ei tin atrobe un término di tres año pa sali for di esei. Ounke al respekto no por primintí nada konkreto ainda, e momentu ku e fondo lo por bai indeksá (parsialmente) atrobe a yega basta serka dor di e rekuperashon espektakular den e último lunanan.

Riba otro terenonan tambe PCN ta dal pasonan firme na e momentunan akí. A hasi un komienso ku invershonnan lokal, pa medio di invershon den e kompania di aviashon EZ-Air. Ta papiando ainda tokante otro proyektonan.

Sigui lesa riba e parti patras...

Invershonnan lokal

Den 2018 PCN ta atendiendo aktivamente ku invershonnan lokal. Invershonnan lokal ta masha importante pa PCN, pasobra PCN di e forma akí por hasi mas pa komunidad. Pensa al respekto por ehèmpel riba empleo i aksesibilidat.

Ora merkadonan internashonal ta bai malu, esaki hopi bes ta afektá merkadonan lokal ménos. PCN a invertí den aviashon, ku kompra di dos avion pa EZ-Air. Di e forma akí PCN kier kontribuí na bon aksesibilidat di e islanan BES.

Ta buska miembro nobo pa AVO

Den 2014 a funda e Órgano di Konseho i Responsabilisashon (Advies- en Verantwoordingsorgaan). AVO ta konsistí di tres miembro, di kada isla un miembro. E año akí e miembro di Boneiru lo baha. Lo hasi un apelasion riba e organisashonnan sindikal, dunadónan di trabou na Boneiru i UPAH pa proponé un persona komo miembro nobo. Esaki por ta un partisipante aktivo, un èks partisipante òf un penshonado. Si bo ta interesá den e funshon akí, bo por pidi e perfil di e funshon serka nos i mèldu bo mes serka bo dunadó di trabou. E miembro di AVO ta haña un formashon pa e por dominá tur materia.

Relato anual i Reglamentu di Penshun

Por haña nos relato anual i reglamentu di penshun 2018 riba nos wèpsait bou di:

www.pensioenfondscn.com/downloads.htm

Bo tim di PCN t'ei pa kla bo



St. Eustatius

Hallo, mi nòmber ta **Ingra Bennett**. Mi a nase i krese riba e isla di Sint Eustatius. Mi a sigui enseñansa superior na Kòrsou i a finalisá e estudio di HBO den Hospitality & Tourism Management.

Desde 2013 mi ta koordinadó di ofisina pa Saba i Sint Eustatius. Mi ta bishitá Saba e último siman di kada luna, kaminda mi ta tene oranan di konsulta pa partisipante- i penshonadonan di PCN.



Boneiru

Hallo un i tur, mi nòmber ta **Suianne Evertsz**, nasé na Boneiru. Mi a kaba mi estudio di BVO Administratie i a optené mi diploma na 2013. Ya pa 4 año kaba, ku hopi plaser, mi ta asistente di e Sekretario Atministrativo di PCN na Boneiru. Tur partisipante aktivo i penshonado por akudí serka mi ku tur nan preguntanan tokante penshun.



Mi nòmber ta **Frederique van den Steen**. Desde 2014 Sekretario Atministrativo di PCN. Huntu ku mi tim mi ta trata na duna informashon mas mihó posibel na tur nos partisipantenan. Tambe mi ta e persona di kontakto pa tur dunadó di trabou i mi tin tareanan di dunamentu di aporte na e direktiva.

Ku plaser nos ta para kla pa yuda bo!

Informashon aktualisá enkuanto e demanda

E dunadónan di trabou di gobièrnu i Stichting Pensioenfonds Caribisch Nederland (PCN) a akordá medidanan pa hasi e fondo di penshun pa Hulanda Karibense mas fuerte. E medida mas importante ta, ku ta fortifiká e kapital di e fondo ku en total 31 mion dollar. E akuerdo ta e resultado di kombersashonnan entre PCN i ministerio di Asuntunan Interno i Relashon di Reino (BZK), den su kalidat di ministerio koordinadó na nòmber di gabinete. Ku esaki e kaso den korte, ku PCN a entamá kontra Estado, ta keda kanselá.



PCN

OFISINANAN

Ofisina na Boneiru

Kaya Carlos C.M. Piar 5, Kralendijk, Bonaire

T 599 717 0984

E info@pensioenfondscn.com

Ofisina na Statia

Mazinga Square, Oranjestad, Sint Eustatius

T 599 318 3218

E Statia-office@pensioenfondscn.com

Saba

T 599 416 6860

E Saba-office@pensioenfondscn.com

Kontinuashon di e promé página:

Pa direktiva di PCN ta importante ku invershonnan lokal no ta kontribuí solamente positivamente na rendimentu di e fondo, pero ku nan ta sosialmente relevante tambe pa e habitantenan di nos tres islanan. PCN tin diferente otro plan mas ku lo benefisiá tantu partisipantenan aktivo komo penshonadonan di e fondo. Den kurso di e lunanan benidero nos tur huntu nos lo sigui traha riba esenan. Gustosamente nos kier brinda bo un facilidad di penshun sólido, un bon servisio i un organisashon ku abo, komo partisipante òf penshonado, por ta orguyoso di dje tambe. PCN desde su fundashon ta hasi esfuerso pa promové sinseridat i transparensia, pero ta pará realmente habrí tambe pa krítika i feedback. Si akaso tin asuntunan ku nos lo por hasi mihó òf ku no ta na òrdu ainda, gustosamente nos kier tende esei. Pa esaki por akudí na Boneiru na nos kantor na Kaya General Carlos Manuel Piar i na St. Eustatius i Saba serka Ingra Bennett di nos ofisina na St. Eustatius. Naturalmente bo por yama nos na 717 0984 òf manda e-mail pa: secretaris@pensioenfondscn.com.

Intenshon di e promé boletin informativo akí ta pa mehorá e komunikashon ku bo komo partisipante i kompartí periódikamente ku bo loke nos ta hasiendo. Nos ta spera ku lo bo ekperensiá e informashon aki positivamente.

Harald Linkels

Presidente